

**Pengerang tak mahu Pak Lah bertanding**  
**Malaysiakini.com**  
**Sept 23, 2008**  
**Muda Mohd Noor**

Ramai ahli Umno di peringkat cawangan di bahagian Pengerang yang bakal diterajui Datuk Azalina Othman Said, mahu Datuk Seri Abdullah Ahmad Badawi tidak mempertahankan jawatan presiden Umno dalam pemilihan parti akan datang.

Mereka juga mahu Abdullah yang juga perdana menteri, menyerahkan kuasa kepada Timbalannya, Datuk Seri Najib Tun Razak sekarang dan bukannya menunggu sehingga 2010.

Ahli jawatankuasa (AJK) bahagian Abdul Kader Basok berkata, maklumat ini diperolehi daripada mesyuarat cawangan-cawangan Umno di bahagian itu baru-baru ini.

Bagaimanapun, katanya, kehendak ahli cawangan mungkin tidak sama dengan pemimpin-pemimpin utama bahagian Pengerang.

"Orang atas ikut angin kerana masing-masing hendak jaga kedudukan," katanya.

Kepimpinan Umno bahagian Pengerang akan bertukar tangan kepada Menteri Pelancongan, Datuk Seri Azalina Othman Said setelah menang tanpa bertanding jawatan ketua bahagian.

Ketua bahagian sekarang, Datuk Harun Abdullah gagal mendapat pencalonan mencukupi untuk mempertahankan jawatan.

Abdul Kader berkata, jika Abdullah berundur lebih awal, masalah yang sedang dihadapi oleh Umno akan selesai.

### **Pelan peralihan**

"Orang Umno dah kurang yakin dan kurang percaya dengan perdana menteri kita sekarang.

"Buat apa lagi beliau perlu menunggu hingga dua tahun kerana dalam politik, pelbagai perkara boleh berlaku.

"Orang anggap semua ini hanya permainan politik untuk mencari ruang untuk kekal dengan jawatan sekarang," katanya.

Abdullah sebelum ini, mengumumkan akan melepaskan jawatan presiden parti Najib pada pertengahan tahun 2010.

Bagaimanapun, ada pemimpin yang meminta beliau melakukan pelan peralihan itu lebih awal daripada yang dijadualkan.

Abdul Kader berkata, orang Umno di Pengerang mahu Mohd Najib dan Tan Sri Muhyiddin Yassin diberi peluang menjadi presiden dan timbalan presiden Umno.

Katanya, ahli-ahli bawahan mahu kedua-dua mereka membuktikan kewibawaan kepimpinan masing-masing, termasuk memulih dan menguatkan semula parti.

Copyright © 1999-2007 Mkini Dotcom Sdn. Bhd.  
Source : <http://www.malaysiakini.com/news/90262>